



endi magalean

Makalu, azpeitiarren jomuga

Seikote gazte bat datorren hilean abiatuko da munduko bosgarren mendi garaiena igotzeko asmoa

Makalura (8.463 m.) abiatuko dira datorren hilaren erdialdera Azpeitiko sei gazte. Bosgarren mendirik garaienera igotzea da euren asmoa. Gehienek beren lehen espedizio handia izango dute, eta nola ez, baita lehen zortzimilakoa ere. Taldeko bik, Patxi Ibarbiak eta Pello Angulok, ordea, eskarmentu gehixeago dute, eta jada badakite zein zapore duen zortzimilako bat garaitzeak.

Ramon Olasagasti / Donostia

PATXI IBARBIA, Pello Angulo, Joseba eta Iñigo Etxezarreta anaia bikiek eta Xabier Odriozola azpeitiarren eta Joseba Manterola oriotarrak osatzen dute taldea. Talde gaztea oso, batez bestekoa egiten hasi eta 26 urtera ez baitira iristen. Dena den, txiki-txikitatik izan dute mendia zaletasun, eta pausoz pauso iritsi zaie Himalayara jauzi egiteko sasoia ere. Horretarako Makalu aukeratu dute, mendi puska ederra. Munduko bosgarren gailur garaiena, lerro eta ertz zorrotzez marraztua, zortzimilakoen artean ederrenetakoa da; mendizaleek beraien aitortzen dutenez, politetan gutxi irabaziko diote.

Jauzia, beraz, ez da nolana-hikoa izango. Dena den, taldeko bik, Patxi Ibarbiak eta Pello Angulok, badute esperientziarik zortzimilakoetan. Pello, Hidden Peak, Broad Peak eta Shisha Pangman izana da, eta azkeneko mendi honen Erdiko gailurrera igo zen, gainera, joan den urtean. Patxi Ibarbiak, berriz, Broad Peak eta Shisha Pangman-ko espedizioetan hartu zuen



Argazkian irudikatua ageri den ohiko bidetik saiatuko dira gailurrera iristen sei mendizaleak.

KIKE DE PABLO

parte Pellorekin batera, eta orain bi urte Broad Peak mendiarren gailur nagusia zapaldu zuen. Bera izan zen hori lortzen lehen euskalduna. Manterola oriotarra ere Kun-en izan zen orain bi urte. Taldeko besteak ere, Pirinioetan, Alpeetan, Peruko Mendizerra Zurian asko ibilitakoak dira.

Ezagupidea ere hortik zuten sei gazteek, mendian asko ibiltzetik alegia. Himalayan zer edo zer egiteko gogoia izan, eta elkarrekin hitz egiten hasi zirela izango da honezkero urtebete ondo pasata. Orduz geroztik asmo honek amets bat baino gehiago lapurtu die. Sortu ere ugari, nola ez. Materiala bildu, mapak begiratu, han izan den jendearekin hitz egin, bidearen xehetasunak aztertu... buru-hauste atseginak denak.

Mendiaren ohiko bidetik • Mendiaren ohiko bidetik egingo dute ahalegina, hau da, aurrena Makalu-La lepora igo eta handik gailurrera daraman bidetik.

Xabier Odriozolak azaldu digunez, Kukuczka esploitik igotzea ere pasatu zitzaizen burutik, baina horrek aurrekontua askotxo igoko ziela-eta, «soka tinko eta material gehiago beharko baikenuen»- ohikoari heldu dote azkenean. «Gainera, baimena tramitatuta iritsi zitzaigun, eta baimen horrek ohiko bidetik egindako saioa babesten du», jakinarazi digu Odriozolak.

Espedizioa ilusioz gainezka hartu dute sei gazteek baina, jakina, ilusioaz gainera dirua ere erruz behar da tamaina honetako asmo bat aurrera eramateko. Beraz, eta behar horri erantzuteko, kamisetak eta errifak atera dituzte, eta horrez gainera, Orioko jaietan txosna bat ere paratu zuten. Azpeitiko Saninazioetarako taberna prestatze lanetan ari dira orain. Bestalde, Kutzak eta Euskadiko Kutzak ere lagundu diete apur bat. Makaluko aldapak, bistan da, oso aurretik hasi zaizkie, baina esaerak dioten bezala, gustuko lekuan...

Luxuzko hamaikakoa

Makaluk hainbat euskal espedizio hartu ditu honen aurretik, eta mendizaleak ere dexente: hamaika, zehatzak izateko.

✖ **Lehen saioan gailurra:** Mari Abrego eta Kike de Pablo 1984ko maiatzaren 16an iritsi ziren gailurrera, Makalu-La ohiko bidetik hain zuzen.

✖ **Bigarrenean ere bai:** Juanjo San Sebastian bizkaitarra 1985eko urriaren 1ean iritsi zen gailurrera, Italiako espedizio bateko beste zenbait kiderekin batera. Jose Carlos Tamayok ere hartu zuen parte saioan, baina infekzio bat zela kausa bertan behera utzi zuen ahalegina.

✖ **Uriartek ezin:** 1988an Felipe Uriarte Makaluko hegokialdeko ertza eskalatzen saiatu zen valentziar batzuekin batera, baina 7.200 metrotik gora ezin izan zuen igo.

✖ **Mendebaldeko pilarea:** Zortzimilakoetan biderik politenetakoa den Makaluko mendebaldeko pilarean saio bat egin zuten Juanito Oiarzabal, Atxo Apellaniz, Kike de Pablo eta Jose Luis Zuloagak 1989an. Maiatzaren 18an gailurretik 130 metrora geratu ziren material eskasiatik.

✖ **Iñurrategi anaiak eta Uriarte:** Felix eta Alberto Iñurrategiren lehen zortzimilakoa izan zen. Hauekin batera, Felipe Uriarte ere, bere bigarren saioan, iritsi zen gailurrera 1991. urteko irailaren 30ean. Ohiko bidetik igo ziren.

✖ **Badiolaren heriotza:** 1991n bertan, Uriarte eta Iñurrategi anaiak gailurrera iritsi eta bi egunera, beste horrenbeste egin zuen Manu Badiola errenteriarak, Carles Valles kataluniarra lagun zuela. Mendebaldeko pilare izugarritik igo ziren, gainera. Behera bidean zetorrela, ordea, labaindu eta hil zen gipuzkoarra.

✖ **Gasteiztarrek iaz:** Joan den urtean Juanito Oiarzabal, Juan Vallejo, Benja Ruiz de Infante eta Alberto Zerian arabarrek osatu espedizioa iritsi zen gailurrera. Ohiko bidetik egin zuten ahalegina, eta maiatzaren 8an iritsi ziren tontorrera Oiarzabal, Vallejo eta Ruiz de Infante. Zerain, berriz, biharamunean ailegatu zen. ✖

FOTO ETXAIDE

Prezio bereziak
mendi federatuentzat
eta
espedizio taldeentzat

Etxaide, 5 - 43 10 77
DONOSTIA

iraty KIROLAK

Okasio ederrak mendirako gauzetan

Legazpi 1 • DONOSTIA • Tel.: 42 30 48